

# Андрей Денисов и феодосиевцы: письма.

## 1. Послание на Выг Феодосия Васильева.

Господи, Иисусе Христе, Сыне Божий, помилуй нас.

Ведомо буди вашей братской о Христе к нам, грешным, любви, о нашем общем и братском совете к вам о церковных догматах, о них же бяше яко же прежде, тако и ныне у вас с нами прѣя и смущение.

*Первое:* о титле, иже на животворящем Христове кресте, еже Пилат написа о слове Христове: "Исус Назарянин Царь Иудейский", о ней же внеслося мудрование от вашей страны, будто тоя титлы на дщице у креста Христова ныне писать христианом и имети неподобно. И от того в ваших странах — в христианы вниде дерзость тое титлу на крестах стирати. И ныне мы слышим от вас на беседе, что впредь о той титле, глаголете, такова мудрования и сомнения, по прежнему, самем вам не имети и инем не вносити, и поклонение кресту Христову с таковою титлою творити; а которые люди тое титлу потерти и дерзнули, ино глаголете, яко не по вашему приказу. И мы слыша от вас сия глаголы, ищем: да покажете нам сие на деле, ради церковнаго примирения, чтобы ваше общее братское о Христе собрание имело впредь образ креста Христова с тое вышеписанною титлою у себя в часовне; а тот христианин, который в вас и после общаго вашего с нами бывшаго примирения тое титлу дерзнул потерти без вашего повеления, о нем же вам известно, да повелит ваша любовь ему тое титлу на том же кресте паки вообразити, да не будет к тому и впредь во иных таковыя дерзости.

*Второе:* была у вас с нами прѣя: егда приидет от неверных муж с женою совокупився законным браком преже познания христианской веры, и по познании веры и по святом крещении — глаголали вы: к тому первое то их брачное совокупление не наречется законный брак и без втораго венчания по крещении, от христианскаго священника, по тому их первому браку в законную жену ему имети невозможно. И ныне мы, будучи с вами обще на беседе, прилежно смотрели во апостольском и отеческом предании: и то их первое брачное совокупление законный брак нарицается и без втораго венчания в церкви имеетя. И мы о сем ищем от вас в примирении, да не будет впредь у вашей любви на той законный брак зазора и порока, да не будем апостольскому и отеческому преданию противиться паче же хульницы.

*Третье:* о ядении с неверными, яко по апостольскому и отеческому преданию не подобает верным христианом с ними вкупе ясти и пити и из их сосудов, яко же и вы на беседе с нами согласно о сем глаголете. И впредь ищем от вашей любви, яко же вам, тако и нам с неверными ни пити, ни ясти, и брашна их не приимати, и сосуды про них во всех христианех особые имети, а из христианских сосудов ясти и пити им не давати, яко же свидетельствует о сем в Патерице Киевопечерском: "не ясти с ними, ни пити из единого сосуда... Тем же: просящим у вас дайте им Бога ради ясти, но в их сосудех, аще ли не будет у них сосуда, — в своем дати и потом, измывше сосуд, дати молитва". И пониже сего пишет: "брашна их не приимати".

*Четвертое:* слышали мы от вас на беседе, яко прияты от вас постриженные от еретик старцы, и по проклятию своих ересей те старцы паки по прежнему в том же старческом образе пребывают без христианских священноиноков пострижения. И о сих ищем мы от вашей любви в примирении, чтоб тем старцам, стриженным от еретик, в иноческом образе не быть, но отложя, бельцами спасение содевать себе, да не внесется в церковь пострижение от еретик.

*Пятое:* да от вас же прияты иноки, иже от простых старцев пострижены, а не от священников, и те старцы у вас начало соборное содержат и действуют, на трапезе хлебец богородичен вынимают, и духовное дело творят, крестят, и на покаяние приемлют, и воду богоявленскую раздают, а овы из них и постригают во иноки от своего образа. И о сих ищем мы от вашей любви в примирении, чтобы те иноки пеклися токмо о своих душах; а вышеписанныя действия творити отстали: понеже в прежняя времена аще где смотрительныя вещи и обретаются, еже случилось быти постриженным и от простых инок, но такова вышеписаннаго действия, еже на трапезе хлебец богородичен вынимати, и крестити, и на покаяние приимати от таковых инок творение не обретается. Бывшим же иноком, постриженным от священноиноков, аще и случилось кого где пострижи, а како и каким чином постригали, и такова устава впредь во свидетельство иным постригати не обретается же. К тому же и смотрительных случаев во обдержный устав кому приимати такожде от божественнаго Писания возбраняется.

*Шестое:* совершаются у вас всенощныя бдения чрез устав святых отец: понеже без священников, и без пяти всенощных хлебов, и без пшеницы, и вина и масла, яже имети устав повелевает. Простым же иноком и со христианы инаков устав в старчествах, ин указ изложен, еже како пети всенощныя. И о сем ищем вашей любви: аще похощете сверх утрени пети и всенощная бдения, и то да поются, якоже в старчествах пишет.

*Седьмое:* да у вас же всегда во исходных поклонех из келий, такожде и в приходных поклонех, входя на службу, полагается после седми поклонов лишний поклон осмый, не по уставу святых отец. Аще ли в субботу и в неделю, такожде и в праздники, в них же несть по уставу земных поклонов: то у вас, исходя от службы, во исходных поклонех в начале полагается два поклона в пояс, а третий в землю, в келию же приходя после "Достойно" на "Слава и ныне" три поклона в пояс, а поклон по счету в землю же полагается всегда, якоже и в приходных.

*Осмое:* да вы же в начале всякой службы начинаете стихом: "За молитв Пречистыя Твоея Матере и всех святых, Господи, Иисусе Христе, Сыне Божий помилуй нас" — не по уставу святых отец.

*Девятое:* в начале Полунощницы, в седмичные дни, поклоны полагаете в пояс не по святых отец уставу, и то на "Слава Тебе, Боже наш", а не на молитве "Боже, очисти мя грешнаго", на ней же святии повелеша три поклоны земныя полагати.

*Десятое:* да у вас же уложено пред Часами не по уставу святых отец, на молебнах и на панихидах, глаголати начало псаломщикам: "аминь. Царю небесный", а не Трисвятое, якоже святии уставиша. Такоже и на Часех глаголют псаломщики ваши не по уставу же святых отец — в начале "аминь, Трисвятое", а не "Царю небесный", якоже святии

уставиша.

*Первое-на-десять:* у вас же после Полунощницы, егда не бывает Утрени, уложено глаголати не по уставу святых отец: начало первому часу: "аминь. Царю небесный", а не "Приидите поклонимся" 3-жды, якоже святии уставиша. А третий час тогда начинают по стисе от настоятеля глаголати не по уставу святых отец: "аминь. Приидите поклонимся", а не "Царю небесный", якоже святии уставиша.

*Второе-на-десять:* почто вы не веруете печатным церковным книгам Московскаго государства, иже суть печатаны до Никонова пременения, при благочестивых царех, такоже и при патриарсех, им же супротивно мудрствуете: сами глаголете и прочих обучили Евангелия, и Апостолы, и Прологи чести, такоже во Октаех и в Минеях говорити, и в Святцах имена святых воспоинати — идеже напечатано имя "Иоанна Предтечи" или "Иоанна Богослова", или "Иоанна Златоуста" и прочих святых, ему же имя "Иоанн", у вас везде глаголется "Иванн": аще случится глаголати "Иоанна", и вы глаголете: "Иванна", или: "Иванне, моли Бога о нас", или "от соборнаго послания Иваннова" или: "от Ивана святаго Евангелия чтение". И сия ваша сопротивность святым царственным печатным книгам зело нас ужасает, чесо ради вы имя "Иоанна" нарицати не имеете и иных в сомнение вводите.

*Третье-на-десять:* да у вас же по уставу, иже в "Сыне Церковном" рук не распространяют на приятие фимиама, но крест, его же человецы на себе носят, из пазухи вынимают и, в руках держа, кадити его предлагают, а не сами той фимиам, по "Сыну церковному" — яко дух жизни, приемлют.

## 2. Послание в Польшу Андрея Денисова [2-е послание]

Понеже убо по нашей с вами беседе о церковном деле, господине Феодосие, изволили вы примирение свое к нам имети в шести статиях, просяще у нас к вам на письме послушания, еже мы, прочетше, советуем вашей любви, в чем примирительное к нам и прочим христианам имети любовное о Христе совокупление.

Кто где от правоверных, по обычаю древним, благочестивых православных царей и святейших архиереев, еже в них, по преданию святых апостол и святых отец, по старопечатным книгам, кресту Господню подпишет "Царь славы, Исус Христос, ника", кроме Пилатова написания, и сие бы вам ересию, якоже на беседе дерзали, впредь бы не нарицати и сомнение в христианы о том не вводите. Но и наше намерение, еже извещаем: мы кресту Господню, и до ныне и впредь, аще и с титулю где во христианех, поклоняемся. Аще ли что впредь о том яснейшее Писание изыщется, тако и по вашему с нами глаголанному совету мудрствовати, и ныне же бы о том друг на друга клеветою и составом не высокоумствовати бы паче, еже подобает во смиреннии о спасении мудрствовати.

Что с вами прежде прях была о брацех: кои люди крещены до отступления веры от священников благоверно, и после венчались у еретиков, иже прежде у вас обычай был их оправдати, а ныне от святых правил та признали вкупе с нами, и приговорили вы, яко брак их неприятен, и без венчания детородием жити им невозможно, чтобы вам в вашем духовенстве сущим таковым известие сказав, утвержати чистым житием жити. А которые от вас крещены, прежде крещения венчались от еретик, и по вашему к нам извещению, вы им по крещении крепче запрещаете о том, чтобы чадородием вместе не жили и одрами бы муж с женою особлялися, и приглашаете им Господне слово: "горе непраздным и доящим в тья дни", и то им приричете, что вы, духовники их, простые люди, а не священники, и очищати их вам молитвами не пристойно, а кои вашего запрещения не слушают, рождает детей, а вы им того в грех не ставите и молитвы тем родильницам даваете: и от того слабость велика в христианы входит и смущение. А и на те браки, в нашей с вами беседе не обрели вы нам яснаго Писания, как в вашем письме написано, чтобы без второго венчания крещшимся вышереченным в церкви законный брак имеется. И о сем молим вашу любовь, чтобы вышереченная слабость крепчайшею цельбою вам поцелити.

А что в ваших письмах и о простых брашнах, от неверных покупаемых, привожено неведомо из какого епитимейника: "аще кто вкусит что снадно жидовско, или болгарско, или срацынско, а неведая, поста осмь дней, а поклонов как ему отец укажет; аще ли ведая, то два лета": и сей ваш привод противен священным правилам. Понеже в Номоканоне печатном в правиле 133 пишет: "аще кто пойдет на праздник варварский или еретический и снесть в той день с ними от них жремая за душу их или спразднует им, два лета да не причастится, по седьмому правилу, иже во Анкире святаго собора". И у святых убо, кто жремая от неверных брашна снест, два лета епитимий. У вас же и простыя их брашна подобны жремым поставлены суть. Молим вас отложить вышереченное то мудрование, да не досада будет и апостольскому, еже на торжищах купити, повелению, разнствовати же от идоложертвенных повелешу; тако же и древним христианом, иже во время Иулиана, отступника царя, на торжищах покупали брашна: тако же и Антонию Великому, и Савве Освященному, и Макарию Желтоводскому, иже от неверных приносима брашна, хлеб, и сыр, и мед, и прочее принимали. Подобне же и у самех вас, у прочих христиан, по нужде брашна у неверных покупая, ядуться. Да вышереченным мудрованием хуление скверноядства и против жремых осуждение да не наведется. А еже с неверными не ясти, и брашна их кроме нужды не покупать, и сосуды особь от них имети, и у нас сие благодатию Божиею соблюдается. Иже от вас читаемый Епитимейник, в нем лгано о 5 вселенском соборе, яко бы был на нем Ориген еретик и у Евсевия Самосатскаго вырвал из рук письмо, а святое Писание повествует: Ориген был за много лет до перваго вселенскаго собора, о чесом летописец свидетельствует и от жития Златоустаго познати мощно. А Евсевий быше между первым и вторым собором при Мелетие, патриарсе Антиохийском. И есть сия явственная ложь о пятом вселенском соборе, от некоего лжесловца оболгано. И в том же Епитимейнике написано правило, не вем откуда, иже Феодосий нам, на беседе будучи, прочитал, разум же правила таков: дьяк живый с женою без венчания и, аще венчается, и по венчании презвитером да поставится. В Номоканоне же печатном правило 179 возбраняет священство таковому: аще кто прежде венчания растлит обручницу свою. И сие правило в Епитимейнике противно божественным правилам святых отец. Но иное кое-что неведомо с коих книг в ней писано. И в беседе будучи,

предлагал вам познати о ней сие несогласие; вы же и сие тшались оправдати любопрением. Молим вас отложить вам таковое мудрование, еже ложное вышереченное оправдати и по неизвестной книге управлять людей, но сосвидетельствуя ю со святыми правилами, из коих книг, или от коих святых в ней правила писаны, и свидетельствованное прочитати, а ложное отложить.

На беседе будучи предлагали вы нам совет, что повелеть отложая иноческий образ, — бельцами ходити тем, кои с обещанием к Богу кроме молитв облещяся в православии во иноческий образ; а наипаче тем, кои прежде были еретическим постриженники, и по проклятию тоя ереси и по отложении еретического пострижения облещяся со обещанием к Богу во иноческий образ. А ныне в письме пишете, яко у нас прияты еретические постриженники. У нас явственнo возведено вам, что Гаврилов отец, отложая еретическое пострижение, потом со обещанием к Богу облещяся в христианстве во иноческое одеяние. А егда мы в Русе в прошлой године с тобой, Феодосием, виделись, тогда ты Гаврилу Евтихиеву, — сам он свидетельствует, — по его молению обещался его отца вышереченного в братстве прияти и, отложая от еретик постриженный образ, самому ему на себе положив иноческий образ, жити по Бозе иночески. А ныне, аки забыв тое свое слово, у нас тем образом во христианах облещяся ему, обещаяся Богу, во иноческий образ, повелеваете бельцом ходити. Якобы тем образом еретическое пострижение приемлется, кое от вас отлагается. Но и в божественном Писании обретается, кои древле, кроме священных молитв во иноческия одеяния облещяся, спаслися. Да и в правильной священноинока Матфея книге от состава 40, от главы 15, о иже кроме молитв иноческим одеянием облачающихся: аще ли кто и троелетие внутрь иноческим кроме молитв одеянием облещется, велико подымет осуждение, аще совлещися сего восхоцет, яко ругаяся явственнo ненаругаемым и неволю бо в сие одеяться понужден будет. И сему божественному Писанию внимающе, мы не смеем тем, иже кроме молитв иноческим одеянием со обещанием к Богу облещяся во благочестивой вере повелети совлещися и поругатися ненаругаемому иноческому одеянию.

Да от иноков, не священников сущих, постриженных, прежде с вами, Феодосием, согласие было от божественных Писаний: тех иноков в согласие вы к себе от нас, еже они крестили, и исповедали, и хлебец Богородичен выимали, и начинати им в службе, вы принимали, и явственнo, со мною беседующе, сих согласие исповедывали; ныне же тех иноков от духовных дел отставити повелеваете, бельцам же, нам, при их службу молитвенную начинати присуждаете. Оставя братскую прежнюю по божественному Писанию любовь, аки распрю любя, вново уставляете, не обретшу на сие от Писания запрещения. Точию глаголете: "понеже в прежния времена аще где смотрительныя вещи обретаются, еже случилось быть постриженным и от простых иноков", и понеже пишете: "и смотрительных случаев во обдержанной устав кому приимати такоже от божественнаго Писания возбраняется". И ваши убо глаголы о иноцех сице. Мы же зело чудимся вашему мудрованию, яко святая церковь постриженных от иноков — не священников издревле приимала, когда и священноиноки были, якоже в житиях святых свидетельствуют. Преп. Антоний Великий пострижен от Павла препростаго, и преп. Паламон постриже пр. Пахомия Великаго, иже после же начальником бысть многим монастырем. И пр. Засима Соловецкий постриже Марка во иноки, и инии мнози подобни тем. И преп. Антоний Печорский приходящих ко иноческому житию приимаше и пострижаше, яко же в житии его пишет. Но и в поучении святаго к братьям, иже к ним глаголаше: "се Бог вас совокупи, братие, и от благословения есте Святыя Горы, ея же игумен постриже мя, аз же вас постригох". И в послании Симона, епископа Владимирскаго, к Поликарпу Черноризцу Печерскому сице пишет: Илариона митрополита, и сам чел еси в житии св. Антония, яко от того пострижен бысть, и тако священства сподоблен. А вы ныне в такую нужду и то за смотрительные случаи оставляете. А у самих вас егда мужа и жену крестите простые, а не священники, и егда они приживут детище, вы же простые и молитвами священническими очищаете, не сумняетесь, еже в божественном Писании такова смотрительнаго случая не видится. Обаче свое дело дерзостно, и в Писании не обретше, оправдаете: а иночество, аще и в божественном Писании есть, отставляете. Но мы не смеем возноситься над иноческий образ, православным им сущим, и, отказав им безвинно, начинати нам, бельцем, пение или в трапезе не дерзаем. Понеже и у Никона преподобнаго в книзе велицей в 16 слове написано: "Вопрос: христоробец некий мирянин вопроси, аще понуждают мя отцы, к ним же прихожду, благословити предлежащая брашна, послушаю ли их, или ни? Ответ: не послушай, глаголя: ниже причетник есмь, ниже образ иноческий нося, но человек есмь мирянин, грешен, и паче меры моя ест, но простите мя Господа ради". А еже нам, по вышереченным, дерзати пред иноки и понуждати облеченных в православии и хотящих иночествовати иночеству поругатися и снимати: боимся и трепещем сея дерзости творити, чтобы не подпасти под святых отец клятвы, яже святая церковь проклиная всех иконоборцев, и иноческаго чина попутелей и разорителей. По вашей любви советуем отложить о иноческом образе христианском ваше мудрование, но яко же прежде с нами было ваше о иноках исповедание, держите и впредь то примирение.

О всенощном бдении, егда первое с тобою, Феодосием, виделись в Старой Русе, тогда утвердили согласие: еже быти всенощному бдению, и в деревне негде с тобою вместе отпели всенощное, и после того с вами согласно о сем и доселе было; ныне же, аки раздор любя, повелеваеши таковое словословие Божие отставити, не приведши на то от божественнаго Писания никакого запрещения, точию глаголя, что без всенощных хлебов не возможно. А по Типику Соловецких Чудотворцев, в монастыре их во храме у Димитрия великомученика, на праздник его, и без всенощных хлебов всенощное исполняли. Да и у самого тебя, Феодосия, без священников не малыя службы: молебны и панихиды, и с молитвами иерейскими, и на вечерни лития, и на Пасху со кресты хождения, и отпевание мертвым с молитвами иерейскими и разрешительными служите; и как во Уставе писано — у игуменов прощение принимали и благословение, сие у тебе во обители братии подаваеши без сумнения. Точию едино всенощное словословие тебе не полюбилось, кое кроме иерейскаго действия у нас точно, вкупе вечерня со утренею, поется вместе. А во Уставе во главе 7 о бдениях всенощных, бывающих воскресных и во владычных праздниках, на кийждо месяц: бдения, пишет, вкупе же и со иными бывають всего лета — бдений 68, еже не подобает никакоже оставляти, и прочая. И паки понижее: есть и ино бдение к сим святому, ему же есть храм в обители, еже должно есть бывати и никако же оставляти в память его. В том же Уставе во главе 54 и 58, и в житии пр. Пахомия Великаго и Саввы Освященнаго, и в книге преподобнаго

Никона, глаголемей Тактиконе, в слове 36, дает знати: яко бывают монастыри и без священников. Сих ради советуем вам и о сем отложить сопрение и держати по прежнему у нас с вами о бдении всенощном безразгласное примирение.

Будуци ныне в Старой Русе, Стефан Рушанин показал писание, тобою, Феодосием, посланное твоим детям духовным, Ивану и Андрею, яко они чрез твой указ крестят и исповедают, и на конце им ты написал: "понеже по святым правилом крещение от вас не крещение и исповеданныи ниже вяжутся, ниже разрешаются". И то в том твоём написании запрещаети свьше архиерейской власти великою дерзости, понеже по священным правилом чрез архиерейской заказ подцерковниц где крестят и от подцерковника крещение кающихся приятно. А у тебя чрез твой, простаго человека, отказ, христианин, аще крестит кого, крещение неприятно. И по той грамотке твоей ученицы твои, Семен Григорьев с прочими, не приемлют от христианина крещеннаго. И то превеликое неопасное превозношение, возносящееся над священными правилами и вземлющееся вязати и решити выше архиерейского святительства, ныне познавше, мы видим и иная не в чин вашего простаго чина творимая от вас, о чем прежде тихостию советовахом вам отложить сия.

1. Рождающим женам даваете священническая молитвы.
2. Молитвы на исповеди прощальныя и разрешательныя.
3. Молитвы на исход души и над представлявшимся.
4. На панихидах и на погребении молитва: "Боже духовом".
5. Молитвы разрешительныя на погребении, глаголемыя властью иерейскою.
6. Мертвым в руки прощальная молитва, даваемая властью иерейскою.
7. Кладезям, без воды освященной, молитвы говорят.
8. Осквернившимся брашном молитва.
9. Молитва сосудам оскверненным.
10. На торжищах продаемым брашном молитву которую говорят? Понеже в Требниках торжищным брашном молитвы не поставлено видится.
11. В посты духовным детем молитвы поповския говорят.
12. Соли, меду и соту и на инья потребности молитвы иерейския глаголют.
13. В баню ходящим молитву, не вем какую, дают, понеже в Потребниках печатных баням молитвы говорить не поставлено.

Да еще и сие различие признается в вас: грамотные люди и простые за молитвы по вашему велению, поклоны полагают. А кои сподоблены духовнаго дела, тии вышереченныя молитвы иерейския на нуждныя людям потребности говорят, и тем у вас при простых людех духовные аки бы священническую власть имеют, от некоего им данную показывают. Видится и по вашему чину неприлично вам иерейския молитвы говорить, но по обыкности простых человек поклонами молиться, а наипаче яко в божественном Писании нигде сими молитвами простым человеком освящати прочих человек, или разрешати, или в руки давати прощальныя повеления, или случая такова когда бывша не написано. А и во святом крещении молитвы иерейския от простых человек не глаголются, но и "Боже духовом", молитва иерейская, на каноне за единоумершаго говорить отказана. И в Номоканоне о духовницах пишет: вопрос: подобает ли благословити женитву, или отроча крестити, или дати роженице молитву? Ответ: священноиноку убо, аще и духовник есть, но не подобает благословити женитву, крестити же человек, яко иерей, имать власть, не возбраняюся в нужду дати до сего токмо. Видится убо и по сему в вопросе о трех вещех вопрошает: 1) о благословении женитвы, 2) о крещении, 3) дати роженице молитву. В ответе же токмо о крещении в нужду поущено, — даже до сего токмо.

Кольми паче нам, простым, о сем поразсудити. Аще ли кому возмнится не возможно спастися, еже отложить вышереченная священническая действия, — помыслити подобает: како и нужнейши бы сего во отступление веры впадшим — миропомазание и молитвы очистительныя; тако же кто яст и пьет со еретики, и закона их и пения слушает, по проклятии ереси — молитвы иерейския. И за сия вся не плачем ли и воздыханием у вас от Бога милость испрашивается?

Сия вкратце любви вашей предлагая, советуем отложить вышереченная действия и во инех мерах, чтобы нам смирением и любовию украшати себе же и друг друга, познавая меру своего чина. Еще же помятуя свои недостатки, у других не лютостью истязательства и находом клевет власти вышотою дерзости, но помнити Глаголющаго: "научитесь от Мене, яко кроток есмь и смирен сердцем, и обрящете покой душам вашим".

### 3. О фодосеевцах Андрея Денисова.

Господь наш Исус Христос, Сын Божий, в святом своем Евангелии волны последних времен предрече: "и тогда соблазнятся мнози, и друг друга предадут, и возненавидят друг друга". И паки — "за умножение беззаконий изсякнет любви многих". Се, еже Спасом прореченное, не точною прежде, но и не меньше ныне видится, поелику и вящше умножившуся беззаконию, от изсякновения любви, волны на братолюбия останки благоверных волнуют. Вместо еже друг со другом совзыскаватися и сподтвержати, ратовати и колебати неукротимо хлопочут. И вместо еже в Спасове любви христианом возгреватися друг о друге и в благоверии утвержати, хулити и возстояти вооружают и волновати колеблют. Еже неутешное плача ревнителем истиннаго благоверия вящше, нежели от внешних, рати предает, и жалость дому Божия сдает ны за толикую возставшую бурю от небратолюбивых мужей, дерзающих, яко словесы, тако и письмены, страждущих за имя Божие и за свидетельство Исус Христово благоверных христиан и ни в чем не нарушающих отческаго древняго благовернаго устава, за еретики огласити. И тако, иже в нас хранимое, истинное, несамочинное и не от нас зачатое, но древнее отческое благочестие прелестию гаждати, дерзкими языки дерзают и дерзати научают. Тем же сим, мянущися ревнители, коликое безместие и не пользу христианом подавают. И первое убо — раскол церковный, еже, по Златоусту: ничтоже тако раздражает Бога, якоже церкви разделятися;

второе — от нравов стязания, смелостию дерзости их, укоряются уставы, иже у святых отец бывшие и от них преданные, — еже стерпимо ли будет отеческое поношение чадом церковным, и церковная введущим; третье — колебание и мятеж христианом; четвертое — хотящим обратиться сомнение, а и внешним коликое возношение, а и своих недостатков неисправление, и непознание, но любви Спасовой заповеди поправление. И за сия вся что ино чаемо, точию Божий гнев, — како не узнаша дерзнувшие расколотворение творити сих всех, но и дерзающие хулою и ратию происходить? Еже слышавши, иже в нас сущие о имени Исусе Христе пустынный скитяне, братски болезновавшие и молящиеся человеколюбцу Богу дати им смиренно чувство, еже не уповати бы во всем на ся, но и прилагати бы уху к ближних полезному совету. Но понеже нужда хотящим меж ими и нами ведати нам показати распрения вину: се-же мы творя, даже наипаче отвещати будем, за отеческия предания, и по отцех, от детей своих обижаемым, поборающе. Сим полезная усоветовахом показанием творити, да и прочие христиане от стязаний и неведения не дерзнут наводити хулы на отеческия уставы и на тщания ревнителей истины и церковнаго примирения любителей. Вал расколу в ровенник да изрыется, и мир и общение, по апостолу, да возсияет. Тем же убо вонмите zde, о боголюбивии читатели и послушатели, еже за кои статьи от них дерзнутое расколотворение ныне, такоже и еже мы не на своих толкованиях и обычаях, но на древних отеческих и церковных готовых преданиях утверждаем. О сем zde к разсуждению вашей любви предлагается.

### *Статья 1-я.*

О надписании животворящаго креста, еже мы, по древнему святых отец преданию, пишем: "Царь славы, Исус Христос, ника". Они же принуждающе писати к сему другое на доске Пилатова подписание: "Исус назарянин, Царь Иудейский", знаменающе его четырьми писмяны: "I. H. C. I.". Мы же о сем Пилатовом написании обыскание творим, — аще святии отцы писаше его на кресте? Зане елико мы обрели церковию святою свидетельствованная древния распятия Господни, и без воображения плоти кресты — на тех написания Пилатова не написано. А понеже никонияне оно написание на кресте пишут, и не токмо на новых нынешние иконописцы, но и на старых приписывают, сего ради да не како, нам неведущим, от их будет где написано. Сих ради взыскуем утвержати от древних, святых и благоверных царей и святейших патриархов и прочих благочестивых архиереев, надписании известно ведомыми, разум обыскания имуще сие. Аще бо у святых обрящется то написание на крестах писано, то и писати произволившему будет тогда без сумнения отеческим, а не своим мнением подкрепляющеся. Аще ли не обрящется в древнем православии, у святых, на крестах, сего написания, дабы и нам не разгласным быти с церковною кафолическою, ведяще известно, яко Духом Святым уставы отеческия озарялися и просвещалися. Но иже с нами любопрящиеся и на нас возстающие глаголют: "почто обыскание о сем творити: святое Евангелие законополагает писати Пилатом написаную титулу на кресте; на что сего больши свидетельства"? И тако они на сем крепче утвержаются. Вонмите же внятно, возлюбленнии, сие мудрование. Аще бо законоположило святое Евангелие Спаса Христа титулу, Пилатом написанную, на кресте писати, то еда святые отцы презрели святое Евангельское законоположение, еже не писали тоя титулу на кресте? Их же колико и сколь великие богословцы, тако без Пилатова написания предаша кресты писати, вкратце zde их отчасти покажем. Устав, еже есть "Око Церковное", избран святыми отцы от многих Типик: Иерусалимскаго, и Святыя горы, и от Студитова, и от многих святых отец, и от вселенских святых собор, и предан святей Божией Церкви; в нем же, в чину о панагии, во главе 53-й, напечатан крест в лицах, надписание к нему: "Царь славы, Исус Христос, ника". Вонмите zde: от вселенских святых собор и от прочих святых отец предано во всю вселенную Божией Церкви на панагии крест имети без Пилатова написания. Еда сии презрели Евангельское повеление, или не узнали его? Смеемо ли тако кому помыслити?

Еще же в книге Потребнике печатном, яже иматъ в себе духовнаго чина власть, рекше вся чины и последования, бываемая от иерей, яже глаголю: святыя тайны, предуставленныя от Спасителя нашего Христа и святых Его духоносных ученик и апостол и святых богоносных отец и учитель — освящения святым церквам и прочая. И в нем, в чину освящения церквам, напечатан крест, како его знаменовати на антимилах, надписание к нему: "Царь славы, Исус Христос, ника". Тамож, на другом, водружальном кресте, тож надписание: "Царь славы, Исус Христос, ника".

Разсудите и zde, боголюбцы: от самого Христа и от святых Его апостол и богоносных отец, во всю вселенную, всем Божиим церквам, на дву крестах, на антимилах и водружальном, надписание без Пилатовых писмен предуставлено быти. Еда и сии презрели Евангельское повеление? Смети тако помыслити или рещи кому?

В тетро-Евангелиях печатных, московских печатей, во Иоаннове Благовестии, в зачале 46-м, в начале перваго страстнаго евангелия на поле печатан крест, надписание его: "Царь Славы, Исус Христос, ника", — без Пилатовых писмен.

На дорниках, в древнее благочестие, ими же просвиры печатали, на кресте надписание: "Царь славы, Исус Христос, ника". В тех просвирах и Агнца закалала в тайнодействе Тела и Крови Христовы, а тожде бяху без Пилатова написания.

Древле, в благочестие, и донныне христиане вси от святаго крещения на рамах у себя носят крест Христов, с благословным надписанием, по обычаю церковному, тоже не имеюще Пилатова написания.

Равноапостольный царь Константин устрои три кресты от чистыя меди, по образу, показанному на небесех от самого Христа, яко же в Пролозе, сентября в 14, написано, и нарече святыя их имена сие: "Исус Христос побеждает".

На данном апостолом Иоанном Богословом преподобному Авраамии Ростовскому чудотворном Распятии надписание: "Исус Христос, ника".

В Переславле-Залесском, в соборной церкви, в ризнице, крест с распятием сотворен по его подписи в лето 666 году, благоверным великим князем Георгием Владимировичем Долгоруким, а на нем на самой доске надписание: "Исус Христос".

На Москве, в соборной Успенской церкви, на за престольном кресте из Корсуня принесенном, на среднем кругу

Распятие мусиею писано, надписание на досце "Исус Христос".

Ту же на Евангелии, старописанном во олтаре, в часовничной лист Распятие, на нем надписание на досце: "распятие Господне", выше "Исус Христос".

Ту же лежит крест, с Распятием, благословящий, с мощми святых, сотворен серебром, и позлащен в лето 7155, и дан по ризе Господни; надписание на досце: "Исус Христос", выше: "распятие Господне".

Ту же златосияющий, благословящий, крест с распятием и с мощми святых, сотворен при царе Феодоре Ивановиче и при патриарсе Иове, повелением царицы, лета 7103; написание на досце: "Исус Христос".

Тамо же, в крестохранительнице, драгоценный крест с Распятием, благословящий, вынизан жемчугом, в нем и часть животворящаго древа, и мощи Петра митрополита, и инех святых, сотворен при том же при царе Феодоре и патриарсе Иове, лета 7102; надписание на нем: "Исус Христос".

В той же церкви, на ковчежце, в нем же риза Господня, крест с Распятием, на нем надписание: "Царь славы, Исус Христос, ника".

Второй ковчежец, вщий, в нем же глаголют риза Господня из Грузин принесена; на нем на кресте надписание: "Царь славы, Исус Христос, ника".

На Москве же, в соборной церкви Благовещенской, над Деисусом дванадесять праздников, меж ими Распятие Господне; надписание на нем: "Царь славы, Исус Христос".

В притворе той церкви, у западных врат, вверху стенным письмом писан образ Распятия, на нем надписание: "распятие Господа нашего Исус Христа".

В приказе Большой Казны стоит крест, сотворенный при царе Михаиле Феодоровиче, из сибирския меди; надписание на нем: "Царь славы, Исус Христос, ника".

У инокописца крест списан со онога, иже сотворен с самага животворящаго древа, на нем же Христос распялся, и пренесен к Москве при благочестивых царех; на нем надписание: "Царь славы, Исус Христос, ника".

Вкупе реши, по различным странам Российския державы, по градом и по монастырем, и в пресловушей обители Соловецкой у преподобных отец Засимы и Савватия и Филиппа митрополита, и прочих чудотворцев, при самех их ставленных кресты, яко же и медныя Распятия Иринарха, Ростовскаго чудотворца, и иныя древлероссийския медныя распятия и благословящие кресты: колико их множество виденные и свидетельствованы: которыя до Никонова пременения писаны и литы и кои точию от нынешних иконописцев не переписыванные, в них же во всех, яко же и в вышереченных порознь написанных, аще и различными надписании, прославляют Спаса Христа, но едино на всех, — еже без Пилатова написания, согласие.

Еще же преподобный Никон Черныя горы в книге глаголемей "Тактиконе" в слове 38-м предлагает: "Паки блюдох всюду честные кресты, надчертаемы — ов сице, ов же инако, а не в едино надписание; о сих убо аз недоумею: исках с трудом подобающее надписание, лучшее уведати, и сего ради написав, послах в соборную церковь патриархии антиохийския; они же, испытавше о сем опасно, списаша ми сице: яко лучше есть написовати святыя и честныя кресты "Исус Христос, Сын Божий".

Вонмем, како и сей, толик и таков муж, иже все божественное, новое и ветхое, Писание ведый, ему же дар учительства, слова, Пречистая Богородица даде, яко же в Книге о вере на листу 197-м пишет. Еда и сей преподобный не знал в Евангелии написаннаго, что Пилат положи титлу на кресте? А ищет с трудом, како лучше творити надписание. И виждь, не дерзкое и не горделивое, не сам о себе дерзну что, но вопросы у отец в патриархии. Что же, в патриархии не ведали ли Пилатовы титлы, а не повелеша ее писати, но повелеша написати "Исус Христос, Сын Божий".

Еще же и на распятиях у Антония Римлянина, в Великом Нове-граде, на самой досце, латинскими письмены, на едином сице изображено:

IHS

X P S ; та же и на другом:

XHS

I P S

К сему же и на Корсунских вратах, в Великом Нове-граде, на Распятии, греческия три слова написаны, яже искусне ведущие глаголют: на всех сих знаменуют не Пилатово написание, а наипаче дает знати, яко не четыре слова и не те, ими же Пилатово написание знаменуется.

Паки же в Великом Нове-граде, на Волховском мосту, чудный крест сотворен, с Распятием, при благочестивом царе Иване Васильевиче и при святейшем и приснопамятном Макарии митрополите, его же во многих житиях российских чудотворцев списатели велика мужа в добродетели и в ведении божественнаго Писания и бодрого пастыря церкви Божией именуют; он же собрал 12 Миней месячных Четых, в них же книги Ветхаго Завета и толкования их списа: то и при толико славнейшем пастыре на оном чудотворном Распятии не написано Пилатово написание, но на самой досце: "Царь славы", и на прочих составех: "Исус Христос, ника" вообразено. Ту же другое Распятие, сотворено при царе Феодоре Ивановиче, на нем надписание то же: "Царь славы, Исус Христос, ника".

Паки же в Минее августовой вышереченнаго митрополита Макария, в книге Козмы Индикоплова, крест вообразен, на нем несть же Пилатова написания.

В той же Минее, на антиминоске вообразен крест, надписание имеющ: "Царь славы, Исус Христос, ника".

Но понеже не неведением покрываема мати наша церковь древняго благочестия, юже, по пророку Аввакуму, слава Спасова покрыла. Многим сущим неудобь разумеваемым речем в книгах и в подписаниях на святых вещех, или где како подписывати: тем же при благочестивых князех и царех во алфавите толкование и указание сказано. В нем же

о кресте животворящем писано о подножии — чесо ради и како пишется? В нем же крест в лицах воображен, надписание его: "Царь Славы, Исус Христос, ника". Под ним "ника" толковано сице: "ника" сказуется "победа на диавола и победитель врагом, а сам не победим ни от кого же"; и инья речи около креста толкованы; а титулы, Пилатом писанныя, на кресте не написано. Ельма убо вси сии — в вышереченных от святых книг и от надписаний — показанныи святии апостолы, и святии соборы, и прочии богословцы, и благочестивии цари, и архиереи не писаша на честных крестах Пилатова написания?

А глаголющие, яко святое Евангелие повелело писать, придают тем, на вышереченных безчисленных святых, оглаголание, аки призревшим Евангелие Спаса Христа, и сами умудряющесе, аки свыше их, от Евангелия взяли писать; а наипаче, яко от неких толь дерзостныя износятся речи: "могли-де и древние не узнати, а святое Евангелие повелевает, — чесо ради не писати". Оле, дерзостнаго зде гласа, зазор на отец наносящаго, понеже и латини, и немцы, и никонияне на Распятях пишут Пилатом написанную титулу. И толь тщаливи нынешние иконописцы, яко и на старых Распятях приписывают. Еда и они лучше святых познали Евангелие Спаса Христа?

Но понеже убо во святем Евангелии от евангелистов, еже во время распятия Христова распинающие Его титулу или вину написаша, повествовано; тако же и у святых о том различная сказания; повеления же, еже впредь писати, не написано. И что ли о оном сказании тии сказующе на животворящем кресте надписание не Пилатовыми речьми, но яко же их Дух Святой просвети, тако богословию Спасу Христу на кресте изобразиша, яко же выше облак свидетельств достоверных, покажахом.

Тем же и мы святая евангельская и прочих святых словеса лобызаем, прилагати же к ним свое толкование, коего повеления там не написано, не смеем. Якоже во инех, сице и в надписании крестном, соблюдаем искушенная от толиких святых мужей в древнем благочестии и времен благоприятных: согласно с ними на кресте надписание пишем, потязания же наводити на их предание не смеем, свою немощ познавающе, ниже древних благочестивых царей и патриархов потязати дерзаем, ниже смеем умаляти от их написанное богословие на кресте, аки бы не совершенное; но точию соблюдать у их содержимая утверждаем, слышаще и Мелетиево в 2-м послании утверждение: "Стойте, держаще отеческия предания непревратно, ни в чем же богоносных отец потязающе, но ниже Божиих людей православных потязати изволяюще".

А и принуждающие писати Пилатова написание, в других, со святых отец богословным надписанием, да покажут нам, древних, святых отец и благочестивых царей и архиереев, в печатных московских книгах, или на Распятях, толико свидетельствованных, яковы мы выше покажахом, тако пишущих, и тако да утверждаются. Но и тогда бы не тако, с нынешним законоизглашением их; но не произвольным и мерным подобием, не наводяще стыда на отец своих.

Ныне же, от отеческих достоверных надписаний, нам не покажут, на ны надходят, — показывают нам у белорусцев, во обоих беседах, в заставицах Распятя без верхней доски и со обвешением напечатанныя, и вопрошаеми от нас: мощно ли за истину почитати и кланяться такому кресту без верхняго состава? отвечающе они "повелеша почитати и кланяться". И сие не простию, но и навящиие учителяе тако предают.

В житии же святого Кирилла Философа, учителя словенскаго, написано: "егда его вопреки Анний патриарх: рцы ми, юноше, како кресту, разорену сушу, не кланяемся ему, не лобызаем его; а вы, аще лице до перси токмо будет, иконную ему честь творящ, не стыдитесь. Философ же отвеща: четыре бо части крест имат, и аще едина его часть убудет, то уже своего лица не являет". А они без четвертой части, верхней доски, крест совершен и поклоняем быти утвердиша и в свидетельство приводити не стыдятся.

Мы же на сих свидетельствах, разгласных со святыми, утвержаться не дерзаем: понеже есть в тех печатех и ино несогласие с московскими древними печатями: пречистаго Владыки имя "Исусово" в инех местех "Иисусом", и такожде "во веки веков" согласно с никонианским; и в Беседах на Деяние обливание в лицах напечатано. Зане тии печатники не под русскими благочестивыми цари и патриархи, но под польскими крали, аще и греческаго согласия держакхуся, пребываху. Но Филарет, святейший патриарх, про их дает ведати, — многая в них виде несогласия церковная, в самых тех христианех, яже суть белорусцы в них нарицаются. И тако на сих свидетельствах утвержаться ненадежно. А наипаче с таковою смелостью, еже во время общаго собрания таково дерзостно изнесли законоизглашение — самый их настоятельствоуй: аще кто отныне, глаголаше, кресты честныя вообразив, подпишет к ним надписание: "Царь славы, Исус Христос, ника", а Пилатом писанныя титулы не напишет, и то ересь, — не буди у нас с ними ни части, ни жребия, ни в сий век, ни в будущий.

Коль ужасно слышати христианским ушесам сицевы дерзостны глаголы, а наипаче известновевающим, яко святии апостолы и богоноснии отцы — о сем облак свидетельств — с тою святою богословию без Пилатова написания писали кресты. А он отныне "ересью" назвал тако писати, и от части, и от жребия того отлучился. И ужасно убо словесное дерзновение, ужаснейше же яко слово сие делом утверждаемо: яко и отлучаются от части и жребия благоверных христиан, инья вины ко отлучению не имуще, точию что по древнему отеческому во всяком обычаи жити утверждаем.

Ныне да разсудят боголюбивии, аще кому хулити или отлучатися за сие, еже пишет без Пилатова надписания: "Царь славы, Исус Христос, ника" на кресте, — приражатися тем будет к вышешоказанным безчисленным лику богословцев и святых отцев, тако предавших святей Божией церкви.

Еще же и сие да вонмут, аще кии и зело ревнителю о Пилатове написании: яко мы своих речей каких на то написание, или каковы законоизглаголанная хулы свои, не полагаем, но утверждаем на ясне изложенном у святых отец надписании; о оном же Пилатове, понеже у святых писано не виденном, обыскание творим, и за сие расколоторитися им, и в своей им ревности не для чего бы было, но будет им сие творити по некоей ненависти и клеветами дополняти свое расколоторение.

После 666-го году, за святую веру страждущие, яко же в Поморье соловецкия и прочие отцы, такоже и около Нова-града страдальцы, велико опасение имеяху, чтоб тайнодействия какого от никониан не прияти. Сих ради и венчавшихся от них утверждаху в чистоте жити, и в закон онаго сопряжения не имети. Сему чину и по иным странам: около Волги елицы от них и прочих таин — крещения и рукоположения — не приемлют, — и доньне храниму. За рубежем же видался обычай: елицы в неведении веры венчались, тех оправдати.

Исперва, аще и крещени и не в ведении посягли, оправдаша. Ныне же тех браки отвергше, стоят в некрещении за посягших, и от них крестившихся, надежду дают им, аще и чадородием живут, кроме епископского иерейского благословения. Утверждение же полагаху как Петр апостол в Риме крестил множество народа, писанное у Иосифа Волоцкого, и паки: как Павел крестил, писанное в Кирилловой книги о новокрещенцах. Но понеже там о браце никакого объяснения несть, усуетовано с ними о том было: до яснаго свидетельства обысковати о сих, а от обоих стран утверждати их девственным жити житием, ныне же они аки некое объясненное свидетельство обрели, понуждают нас вышереченный брак оправдати и исповедание такое дати, якоже и они написали еже то их первое брачное совокупление законный брак нарицается и без втораго венчания в церкви имеется утверждается же мнение сие апостольским, еже к Коринфом: Павел мужу верну с неверною женою жити, аще волит, или верной жене с мужем неверным. Нам же видится сие апостольское их брака не подтверждает, понеже у них оба крестятся, а не едина часть и о их браке, еже как оба крестятся, еще же и о простых, ту ничего не написано, а наипаче яко Матфей Правильник в правиле 72-м 6-го собора в 3 составе о оном апостольском пишет: "якоже к Коринфом великий уставляет Павел, аще бо волит, рече, с неверным жити верная, или супротив паки верный с неверною, да не разлучается; освятит бо ся муж неверен о жене верней, и супротив паки; обаче зри, как и божественный апостол снисхождение творя: аще волит, рече, верная часть жити с неверною, яко же аще не волит, без сумнения — брак да разрешится, уповающе, яко начала ради бяху сия, и начаток проповедания. А еже днесь имящее, како есть мощно, иудеину или агаряину крещуся, или крестившийся с неверовавшим? яко же и при патриарсе бысть Феодосии: прискавичар бо царский всяко патриаршим писменем распустися с женою, непокоряющежеся мужеву, много молящуся благочестие прияти". И аще священными правилами воспрещено верному с неверной жити, почто сиевое приводит во свидетельство? да и то ко иному лицу, да еще и с такою смелостью, что и других принуждати, неосвященный от епископского и иерейского благословения брак оправдovati глаголюще: без втораго венчания в церкви законный брак имеется; мы же на оправдание его не видевши яснаго свидетельства, оправдovati и надежды им жити чадородием подати не можем; а наипаче ясным церковным свидетельством без священнословия брак не приемлющим, в вышереченной правильной Матфеевой книге, в составе 3, в правиле Василия Великаго 38, объявляя про прежнее и еже нам утвержденное, глаголет. "Но тогда убо с пристанием единым браком стояше, в нас же не убо состоятися может кроме священнословия". И паки в Кормчей, в главе 43, лист 335: "и отседе не быти инако не именоватися законному браку и христианскаго строения достойну, аще не молитвы совокупающихся, рекше жениха и невесту в любовь свяжут". И паки ниже, в тойже главе, лист 336: "елико же аще без священных молитв своя рабы на сочетание брака совокупающе, не боголюбив брак составляют им, но блудническое смешение утверждают, их же бо не совокупи Бог священными молитвами призываем, тии вси сходятся на грех". И паки в той же главе, л. 336 об.: "и браки по первому неподобному даже и доньне держащемся обычаю заматоревшуся подобает на тех священным молитвам быти". Еще в той же Кормчей — о тайне супружества, сиречь законнаго брака, в главе 58, лист 521, пишет: "изрядне же да весть иерей, яко супружества между восхищающим и восхищенною, егда сама восхищенная во власти восхищавшаго ю пребывает, такоже и потаенная и вся прочая супружества, яже не с благословением церковным, и чинным от своего си пастыря, си есть от епископа или от тоя parroхии священника венчанием, при двух или трех поне свидетелей совершаемая по соборному уставлению и святых отец учению, незаконна, паче же беззаконна и ничтоже суть".

И понеже при толь крепких утверждениях святых нам невозможно пригласити их брака, не слышавши от них яснаго на него подкрепления, а наипаче без епископского и священническаго благословения; и во время сие простому нашему чину, не брачное, но плачевное.

Того ради против их речей и письма на беседе написано от нашей страны им сие: что с вами прежде пряха была о брацех, кои люди крещены до отступления веры от священников благоверно, и после венчались у еретиков, иже прежде от вас обычай был их оправдати, а ныне от святых правил признали вкупе с нами и приговорили вы, яко брак их не приятен и без венчания детородием жити им невозможно, и чтобы вам, в вашем духовенстве сущим, таковым известне сказав, утверждати чистым жити житием. А котории от вас крещены, а прежде крещения венчались от еретиков, и по вашему к нам извещению, вы им, по крещении, крепче запрещаете о том, чтобы чадородием вместе не жили и одрами муж с женою особлялися; а приглашаете им Господне слово: горе неспрадным и доящим в тья дни, и то им приричете, что духовники их — простые люди, а не священники, и очищати их вам молитвами не пристойно; и кои вашего запрещения не слушающе, рождает детей, а вы им того в грех не ставите, и молитвы тем родильницам даваете, и от того слабость велика в христианы входит, и смущение, а и на те браки, хотя бы и при священницех но в нашей с вами беседе не обрели вы нам яснаго Писания, как в вашем письме написано, что без втораго венчания крещимся вышереченным в церкви законный брак имеется. И о сем молим вашу любовь, чтоб вышереченная слабость крепчайшею цельюю вам исцелити.

### *Статья 3-я.*

Но убо во время сие многоскорбное, гонительное, странствующим христианом случается по нужде купити брашна на торжище. Они же за сие велико осуждение наводят в словесех и писмами, — беззаконное и нечистое сквернение именуют, и брашно то скверно и нечисто, и мотылами, и гноем нарицают, и ядущих сия и особь неприобщенных, мотылоядцами вменяют. И тако обхуливши, и сами не минуют его, но покупают и ядят.

На те же торжищная брашна молитву из Потребника говорят, которая не к тем брашном торжищным написана, да еще и поповская, а торжищным брашном никакой молитвы говорить не указано.



Да в письме их, что в нашу страну настоятельно их привезе, написано: "за торжищная брашна 2 лете епитимии", противно святым правилам.

И яже кто к покупке на торжищах брашна приведет во свидетельство апостольское речение: "все, еже на торжищи продаваемое, ядите, ничто же разсуждающе за совесть", — они же, в вышереченном письме, за сие к тем, тако глаголюще, хульствуют: "со иже вместе с неверными ядущими, едино нечестие вводит". И паки: "апостольское слово взем, яко волцы агньцу к себе поревая, рвете". И они убо тако дерзости о сем происходят. Мы же ужасаемся их толика дерзости, понеже и святии оно апостольское слово предлагают сице. От Бесед Апостольских к коринфом, лист 25: Апостол: "все, еже на торжищи продаемое, ядите. ничтоже сумнящися за совесть". Златоустый же в той же беседе тако глаголет: "Аще бо не ведый, рече, яси, не подлежиши мучению; неведения бо прочее вещь, не гортанобесия, и не сего точию свобождает и подвизания, но и другаго, многу отраду и свободу им уготворя, ниже бо разсуждати оставляет, сиречь истязовати и вопрошати: аще идоложертвенное есть, или не таково, но просто ясти все, еже из торжища. Ниже то навьцати, еже что есть предложенное, тако, яко есть мощно, и ядуще неведущему, свободитесь. Такова бо суть, яже не естеством злая, но от помысла творящая нечистое. Сего ради, рече, ничтоже сумнящися: Господня бо есть земля и исполнение ея, а не бесовска, аще ли земля и плодове и безсловесна суть, Егова вся, несть ничто же нечисто: но инако нечисто бывает — от помысла и преслушания".

Преподобный Никон в Велицей книзе, в слове 62-м, в начале его, воображает: "о снеди подобающей, иже в мире живущим, и как достоин питаться христианом?" И пониже, во оном слове, апостольское оно к коринфом предлагает: "Все, еже в разумнице продаемое, ядите, ничтоже потязающися". К нему же и вышереченное Златоустово сказание написует.

Святой же Георгий в книзе Криницы, царства 44, Иулиана преступника: "Иулиан же скверный, обаче яве не стыдяся, на правоверствие вооружашеся, и первое бо сущим во граде внутрь и вне уду истоки жертвами скверными оскверняше, яко же примет воду, уполучит и ненависть. Послежде же на торгу продаемая оскверняше; обливаше бо и хлебы, и мяса, и овощь, и зелие, и прочая. Елико над сими убо видящие христианы стонаху и плакаху, обываемых приимаху ядь, апостольску же закону последующе глаголющему: всяко продаемое на торгу ядите, ничим же испытующе за совесть".

И тако святии апостольское оно слово к покупке на торжищах брашен предлагаху.

А они за сие глаголют, яко нечестие вводит, апостольское слово, яко волцы, агньцу к себе поревая, рвете. Пощади Господи, на кого будет сиевая нелепая хула!

И где бы о таком их вышемерии самем им поцелитися советом от божественных Писаний, они же и нас привлекают, глаголюще: "яко же у нас, тако и вам одинако о том имети".

Мы же, видяще в божественном Писании — мнози святии и древнии христиане у неверных брашна, в случае на ядение, и покупали и принимали: боимся тако хулити, да не обрящемся святых хульники. Сего ради на беседе вкратце им тако от нашея страны написано: "Да что в ваших письмах и о простых брашнах, от неверных покупаемых, привожено неведомо из какого Епитимейника: аще кто вкусит что снедно жидовско, или болгарско, или сарацинско, а не ведая, поста осмь дней, а поклонов — как ему отец укажет, аще ли ведая, то два лета", — и сей ваш привод противен священным правилам. Понеже в Номоканоне печатном, в правиле 133-м, пишет: "аще кто пойдет на праздник варварский, или еретический, и снест в той день с ними от них жремая за душу их или спразднует им, лета два да не причастится, по седьмому правилу, иже во Анкире святого собора", и у святых: убо кто жремая от неверных брашна снест, два лета епитимии; у вас и простыя их брашна подобны жремым поставлены суть: молим вас отложить вышемерное то мудрование, да не досада будет и апостольскому, еже на торжищах купити, повелению, разньствовати же о идоложертвенных повелешу. Тако же и древним христианом, иже во время Иулиана отступника царя, на торжищах покупали брашна. Также и Антонию Великому, и Савве Освященному, и Макарию Желтоводскому, иже от неверных приносима брашна: хлеб, и сыр, и мед, и прочая принимали. Подобне же и у самех вас и у прочих христиан, по нужде брашна, у неверных покупая, ядуться. Да вышереченным мудрованием хуление скверноядства, и против жремых осуждение, да не наведется. А еже с неверными не ясти и брашна их, кроме нужды, не покупати, и сосуды особь от них имети, и у нас сие благодатию Христовою соблюдается".

И понеже у их из коего Епитимейника привожено о брашнах, в нем и иная безместная лжа обрелася, — и на речах им было предложено о сем. Они же не точию ухо приложиша слышати, но и сопротив досаждаху нам. Того ради им на письме, под ту же третью статью, написано им тогда сице: "Иже от вас прочитаемый Епитимейник, в нем же лгано о пятом вселенском соборе, яко бы был на нем Ориген еретик и у Евсевия Самосатскаго вырвал из рук письмо; а святое Писание повествует: Ориген бе за мною лет до перваго вселенскаго собора, о чесом летописцы свидетельствуют; и от жития Златаушнаго познати мощно; а Евсевий бяше между первым и вторым собором при Мелетии, патриарсе Антиохийстем, и есть сия явственная ложь о пятом вселенском соборе, от некоего лжесловца оболгано. И в том же Епитимейнике написано правило, не вем откуда, иже Феодосий нам, на беседе будучи, прочитал; разум же правила таков: диак, живой с женою без венчания, и аще венчается — и по венчании презвитером да поставится. В Номоканоне ж печатном, правило 179, возбраняет священство таковому, аще кто преже венчания растлит обручницу свою. И сие правило в Епитимейнике противно божественным правилам святых отец. Но и иное кое-что, не ведомо с коих книг, в ней писано. И в беседе будучи, предлагали вам познати о ней сие несогласие; вы же и сие тщалися оправдати любопрением. Молим вас отложить вам таковое мудрование, еже ложное вышереченное оправдати, и по неизвестней книге управляти людей. Но, сосвидетельствуя ю со святыми правилами, из коих книг, или от коих святых в ней правила писаны и свидетельствованное прочитати, а ложное отложить".

#### **Статья 4-я.**

За одеяние иночества в христианстве было беседовано им от Писания на беседе, а по беседе против их письма написано им сице: "На беседе будучи, предлагали вы нам совет, что повелеть, отлагая иноческий образ, бельцами

ходити тем, кои с обещанием к Богу, кроме молитв облекшесь в православии во иноческий образ, а наипаче тем, кои прежде были еретические постриженники, и по проклятии тоя ереси и по отложении еретического пострижения, облеклись со обещанием к Богу во иноческий образ; а ныне в писме пишете, яко у нас приюты еретические постриженники. А у нас явственно возведено вам, что Гаврилов отец, отложя еретическое пострижение и потом, со обещанием к Богу, облекся в христианстве во иноческое одеяние. А егда мы в Русе, в прошлой године, виделись с тобою, Феодосием, тогда ты Гавриле Евтихиеву, — сам он свидетельствует, — по его молению, обещался его отца вышереченного в братство прияти и, отложя от еретик постриженный образ, самому ему на себя наложив иноческий образ, жити по Бозе иночески. А ныне, аки забыв то свое слово, у нас тем образом, в христианах, облекшуся ему, обещаюся Богу во иноческий образ, повелеваете бельцами ходити, яко бы тем образом еретическое пострижение приемлется, кое от нас отлагается. Но и в божественном Писании обретается [на поле: Патерик Египетский, глава 10, житие Аполинарии]: кои древле, кроме священных молитв во иноческая облекшесь, спаслися. Да и в Правильной священоинока Матфея книге, от состава 40, главы 15: иже кроме молитв иноческим одеянием облакающихся, аще ли же кто и троелетие внутрь кроме молитв одеянием облечется, велико подымет осуждение, аще совлещися сего восхошет, яко ругаяся явственне ненаругаемым, и неволю бо в сие одетися понужден будет. И сему божественному Писанию внимающе, мы не смеем тем, иже и кроме молитв, иноческим одеянием со обещанием к Богу облеклись во благочестивой вере, повелети совлещися и поругатися ненаругаемому иноческому одеянию".

#### **Статья 5-я.**

Постриженных от не священников иноков принимали прежде, и ныне принимают. Точию ныне вновь отставляють: от всякаго духовнаго дела, и не начинати им пеня, но бельцем та вся творити. Против сего им отвещано вкратце сице: "да от иноков, не священников сухих, постриженных прежде с вами, Феодосием, согласие было от божественных Писаний: тех иноков в согласие к себе от нас, — еже они крестили и исповедали и хлебец Богородичен выимали, и начинати им в службе, — вы принимали, и явственне со мною беседующе, сих согласие исповедывали. Ныне же тех иноков от духовных дел отставити повелеваете; бельцам же, нам, при их службу молитвенную начинати присуждаете. Оставя братскую прежнюю, по Божественному Писанию, любовь, аки распрю любя, вновь уставляете, не обретши на сие от Писаний запрещения. Точию глаголете: "понеже в прежния времена, аще где смотрительныя вещи обретаются, еже случилось быти постриженным и от простых иноков", и пониже пишете: "и смотрительных случаев во обдержный устав кому приимати такоже от божественнаго Писания возбраняется". И ваши убо глаголы о иноцех сице. Мы же zelo чудимся вашему мудрованию, яко и святая церковь постриженных от иноков, не священников, издревле приимала, когда и священоиноки были; яко же в житиях святых свидетельствуют: преподобный Антоний Великий постриже Павла препростаго; и преподобный Паламон постриже преподобнаго Пахомия Великаго, иже послежде начальник бысть многим монастырем; и преподобный Засима Соловецкий постриже Марка во иноки, и инии мнози подобни тем; и преподобный Антоний Печерский приходящих ко иноческому житию приимаше и пострижаше, яко же в житии его пишет; но и в поучении святаго к братьям, иже к ним глаголаше: "се Бог совокупи вас, братие, и от благословения есте Святыя горы, им же игумен постриже мя, аз же вас постригох". И в послании Симона, епископа Владимирскаго, к Поликарпу, черноризцу Печерскому, сице пишет: "Илариона митрополита, и сам чел еси в житии святаго Антония, яко от того пострижен бысть, и тако священства сподоблен". А вы ныне в такую нужду и то, за смотрительныя случаи, отставляете, а у самех вас, егда мужа и жену крестите простые, а не священники, и егда они приживут детища, вы же, простые, и молитвами священническими очищати не сумляетеся, еже в божественном Писании такова смотрительнаго случая не видится. Обаче свое дело дерзостно, и в Писании не обретше, оправдаете, а иночество, аще и в Божественном Писании есть, отставляете. Но мы не смеем возноситься над иноческий образ, православным им сущим, и, отказав им безвинно, начинати нам, бельцем, пеня или в трапезе не дерзаем. Понеже и у Никона преподобнаго, в книзе Велицей, в 16 слове, написано. "Вопрос: христоробец, некий мирянин, вопроси: аще понуждают мя отцы, к ним же прихожду, благословити предлежащая брашна, послушаю ли их, или ни? Ответ: не послушай, глаголя: ниже причетник есмь, ниже образ иноческий нося, но человек есмь мирянин, и грешен, и паче меры моя ест, но простите мя, Господа ради. А еже нам вышереченным дерзати пред иноки и понуждати облеченных в православии и хотящих иночествовати — иночеству поругатися и снимати, боимся и трепещем сея дерзости творити, чтоб не подпасть под святых отец клятвы, яже святая церковь проклиная всех иконоборцев, и покаяния образа плачевнаго — иноческаго чина поправателей и разорителей. Но и вашей любви советуем отложить о иноческом образе христианском вышевспомянутое ваше мудрование; но яко же прежде с нами было выше о иноках исповедание; держите и впредь то примирение".

#### **Статья 6-я.**

Понеже нечего им к расколу вины на нас обрести; о всенощном славословии, — о чем прежде в согласии было и на беседе о сем ничего не говорили, — по беседе же на письме о том зазирають, не смотря себе, о чем им отвещано тогда сице: "О всенощном бдении, егда первое с тобою, Феодосием, свиделись в Старой Русе, тогда утвердили согласие, еже быти всенощному бдению, и в деревне негде и с тобою вместе отпели всенощное, и после того с вами согласно о сем и доселе было. Ныне же, аки раздор любя, повелеваеши таково славословие Божие отставити, не приведши на то от божественнаго Писания никакого запрещения, точию глаголя, что "без всенощных хлебов не возможно". А по Типику Соловецких чудотворцев, в монастыре их, во храме у Димитрия великомученика, на праздник его, и без всенощных хлебов всенощное бдение исполняли. Да и у самаго тебя, Феодосия, без священников не малыя службы: молебны и панихиды, и с молитвами иерейскими, и на вечерни лития, и на Пасху со кресты хождение, и отпевание мертвым с молитвами иерейскими и разрешательными служите, и, как во Уставе писано, у игуменов прощение принимали и благословение — сие у тебя во обители братии подаваеши без сумнения. Точию едино всенощное славословие тебе ныне не полюбилось, кое, кроме иерейскаго действия, у нас точию вкупе вечерня со

утреню поется вместе. А во Уставе, во главе 7, о бдних всенощных, бывающих воскресных, и во Владычных праздниках, на кийждо месяц бдения, пишет: "вкупе же и со иними бывают всего лета бдений 68, их же не подобает никакоже оставляти, и прочая. И паки пониже: "Есть и ино бдение к сим — святому, ему же есть храм во обители, еже должно есть бывати, и никакоже оставляти в память его". В том же уставе, во главе 54 и 58, и в житии преподобнаго Пахомия Великаго и Саввы Освященнаго и в книге преподобнаго Никона, глаголемей "Тактикон", в слове 36-м, дает знати, яко бывают монастыри без священников. Сих ради советуем вам и о сем отложити сопрение и держати, по прежнему у вас с нами о бдении всенощном безразгласное примерение".

По сих, тогда же написано им к познанию самех себя сице, надеюся, по Соломону: "дай премудру вино, и премудрее будет".

"Будучи ныне, в Старой Русе, Стефан Рушанин показал писание тобою, Феодосием, посланное твоим детям духовным, Ивану и Андрею, яко они чрез твой отказ крестят и исповедуют. И на конце ты им написал: "понеже по святым правилом крещении от вас не крещени, и исповедании ниже вяжутся, ниже разрешаются. И тако, в том написании, запрещаеши свыше архиерейской власти великою дерзостию, понеже по священным правилом, чрез архиерейский заказ подцерковницы где крестят, и от подцерковника крещение кающихся приятно. А у тебя чрез твой, простаго человека, отказ христианин, аще крестит кого, крещение не приятно. И по той грамотке твоей ученицы твои, Семен Григорьев с прочими, не приемлют от христианина крещенаго. И тое превеликое, неопасное, превозношение, возносящееся над священными правилами и вземлющееся вязати и решити выше архиерейскаго святительства ныне познавше, мы видим и иная не в чин вашего простаго чина творимая от вас, о чем и прежде тихостию советах вам отложити сия:

1. Раждающим женам даваете священническия молитвы.
2. Молитвы на исповеди прощательныя и разрешательныя.
3. Молитвы на исход души и над преставльшимся.
4. На понахидах и на погребении молитва: "Боже духовом".
5. Молитвы разрешительныя на погребении, глаголемыя властью иерейскою.
6. Мертвым в руки прощальная молитва, даваемая властью иерейскою.
7. Кладезем без воды освященной молитвы говорят.
8. Оскверншимся брашном молитва.
9. Молитва сосудом оскверненным.
10. На торжищах продаемым брашнам — молитву которую говорят? Понеже в Потребниках торжищным брашном молитвы не поставлено видится.
11. В посты духовным детям молитвы поповския говорят.
12. Соли, и меду, и соту, и на иныя потребности молитвы иерейския глаголют.
13. И в баню ходящим — молитву какую дают? понеже в Потребниках печатных баням молитвы говорить не поставлено.

Да еще и сие различие признается в вас: грамотные люди и простые и иные, за молитвы, по вашему велению, поклоны полагают, а кои сподоблены духовнаго дела, тии вышереченныя молитвы иерейския на нужныя людем потребности говорят. И тем у вас, при простых людях, духовные аки бы священническую власть имеют, от некоего им данную показываются, — видится, и по вашему чину, не прилично вам иерейския молитвы говорить, но, по обычности простых человек, поклонами молотися. А наипаче яко в божественном Писании нигде сими молитвами простым человеком освящати прочих человек, или разрешати, или в руки давати прощальная повеления, или случая такова когда бывша, не написано. А и во святом крещении молитвы иерейския от простых человек не глаголются, но и "Боже духовом" — молитва иерейская, на каноне за единоумершаго, говорить отказана, и в Номоканоне "О духовницех" пишет: "Вопрос. Подобает ли священноиноку благословити женитву, или отроча крестити, или дати рожанце молитву? Ответ: Священноиноку убо, аще и духовник есть, не подобает благословити женитву, крестити же человека, яко иерей, имать власть, не возбраняюся в нужу даже до сего токмо". Видится убо, и по сему, в вопросе о трех вещех вопрошает: 1. О благословении женитвы, 2. О крещении. 3. Дати роженице молитва. В ответе же токмо о крещении, в нужду, поупущено, даже до сего токмо. Кольми паче нам бы, простым, о сем поразсудити. Аще ли кому возмнится невозможно спастися, еже отложити вышереченная священническая действия: помыслити подобает, како и нужнейше бы сего во отступление веры впадшим — миропомазание и молитвы очистительныя, такоже кто яст и пиет с еретики, и закона их, и пеня слушают, по проклятии ереси, молитвы иерейския. И за сия вся не плачем ли и въздыханием у вас от Бога милость испрошается? Сия вся вкратце любви вашей предлагая, советуем отложити вышереченная действия и во инех мерах, чтоб нам смирением и любовию украшати себе же и друг друга, познавая меру своего чина; еще и памятуя свои недостатки, о других не лютостию истязательства и находом клевет власти высотою дерзати, но помнити глаголющаго: "научитесь от Мене, яко кроток есмь и смирен сердцем, и обрячете покой душам вашим".

Ельма убо солга надежда наша, вместо еже бы им познати себе и исправитися, приложиша к прежним шести статьям, ответу не написав за ся, возражати древния отеческия обычаи, у нас не самочинием коим, но от отец древних приятые, наипаче Соловецкия святыя обители, коему уставу во всем последуем, помняще и во Евангелии недельном и в неделю о православии глаголанная: вся церковная предания, писанная и неписанная, узаконная предания нам непреложно сохраняюще. Тем же, и противу их стязания, за отеческия чины вкратце zde отвечаем.

#### ***О приходных и отходных поклонех.***

Различные обычаи у святых отец бяху о сих поклонех. В Полууставе печатном, 4 поклона положено. Во Уставе же, при патриарсе Гермогене печатном, 4-же поклона. В "Старчествах" до "Достойно" 4 поклона велено, а по "Достойно" 2 поклона. В "Сыне Церковном" иным подобием. Во Иосифовских печатех 7 поклонов. Во Уставе Царь-Михайловском, при Иоасафе патриарсе, и в Триодех постных Иосифовских 8 поклонов, с целованием икон, положено.

В Соловецкой и прочих древле обителех в России 8 поклонов без целования покладаху. От них же и у нас той чин содержится. В сих отеческих обычаех не подобало бы стязания заводити, да людьми колебати, да еще таким словущим учителем. А егда в пояс бывают отходные поклоны, тогда, отходя от церкви, 2 поклона в пояс, а 3 в землю. Тако в Соловецкой и прочих обителех бяше обычай. Но и во "Отечнике", собранном священноиноком Дорофеем, тако два поклона в пояс, а 3-й в землю, егда поклоны бывают, повелевает. Тако и у нас лепотной отеческой чин соблюдается, и всуе и туне сие порицати кто дерзает.

#### ***О замолитвовании.***

В начале всякой службы, вместо еже "За молитв святых отец наших", молитва у нас, старец, от соловецких старцов по обычаю обители их, глаголет: "За молитв Пречистыя Ти Матере и всех святых", и молитва. Они же и сие замолитвование порицают, глаголющ: "то не по уставу святых отец". А и во всех Псалтырех печатных, в начале вечерни, положено зачинать тако: "За молитв Пречистыя Ти Матере и всех святых", точию ту молитва другая присовокуплена. А яко в Соловецкой обители начинали, тако и в Отечнике древнем написано: "За молитв Пречистыя Ти Матере и всех Святых, Господи Исусе Христе, Сыне Божий, помилуй нас". А в "Сыне Церковном": "За молитв Пречистыя Ти Матере и Святых Отец наших, Господи Исусе Христе, Сыне Божий, помилуй нас" — написано. И тако сей зазор — на древних будет.

#### ***О поклонах в начале полунощницы.***

Наедине в келии велено, выговоривши: "Слава Тебе, Боже наш", постояти мало, дондеже утишатся вся чувства, и потом 3 поклона до земли положить. И не точию в простые дни, но и в неделю такоже, яко же в полудестевом, при Иоасафе патриарсе, Каноннице ясно напечатано. Они же сами по единственному келейному чину не исправились. 1-е: выговоривши: "Слава Тебе, Боже наш", не постоят мало, дондеже утишатся вся чувства; 2-е: в субботу и в неделю те поклоны не по тому единственному уставу в землю, но в пояс полагают. А древний порицают соборной обычай, — не точию в Соловецкой обители древле, но и у всех благоверных россиян содержимой, кой и мы обычай имеем, с прочими церковными поклонами в едино полагаем. И яко же соборной обычай церковь содержала о первых поклонах на полунощнице, тако дает в Уставе большом печатном, знати повелевает: аще прилучится Трех Святителей в среду или в пяток Сырныя недели (лист 452) полунощницу же поем, по обычаю, без поклонов, точию по "Честнейшу" творим 4 поклоны великих; такоже в Четырнадцатнице в понедельник 1-я недели поста (на листу 938): и собравшися в церковь, поем полунощницу без поклонов, токмо по "Иже на всяко время" в конец, 4 поклоны великия. На листу же 980, в четверток 5-я недели поста написано: "полунощницу же поем без поклонов в келиях, а приходные и отходные поклоны тогда земные". И тако, по Уставу Святых Отец, те первые поклоны в соборном пении особь от прочих церковных поклонов, в землю не велено покладать. Тем же, зазирати сему святых отец чину неприлично, всюду повсемственно державшемуся [А дерзающе хулити сей святых отец чин да внимают чинимую чину вопреки ударяюще, дерзают].

#### ***О начале часов, молебна и панихиды.***

Мы в начале часов "Царю небесный" глаголем; а панахида, егда по вечерни бывает, "Святой Боже" говорим; такоже и на молебне. Но токмо — егда молебен часы предваряет, тогда в Типице или Обиходнице преподобных отец Засимы и Савватия велено на молебне в начале "Царю небесный", а по молебне на Часех "Святой Боже". Тако благолепное чина у преподобных отец, яко же и во уставе, после полунощницы, на утрени велено в начале "Святой Боже"; а егда утренняя кроме полунощницы начинается: "Царю небесный" глаголати. Убо преподобных Отец церковные обычаи содержати благолепно есть, по реченному от Христа ко святым апостолам: "слушай вас, Мене слушает".

#### ***О первом часе, егда кроме утрени бывает.***

Еже у нас трудные братия от утрени после экзасалмов отходят, отйти им на отхожие нужные труды, и в трапезе при оных трудниках говорят Часы: в начале первый Час, понеже не пет у них и к первому Часу начинают "Царю небесный", к последующим же Часом "приидите поклонимся", сему чину согласуют. Егда 1-й Час, особь от утрени, вместе с прочими поется, — в навечерии Рождества Христова и Крещения, — тогда велено в Трефолоях и в Минях в начале к первому Часу "Царю Небесный", к прочим же Часом "Приидете поклонимся" глаголати. А зазирающие нам да покажут поне едино Писание, егда без утрени 1-й Час говорится, како его начинати велено, и тогда тако да зазирают. Ныне же да устыдятся священнаго Евангелия, глаголющаго: "Оцежающие комары, вельбуды же пожирающе".

#### ***О имени Иоаннове.***

Имя сие в древних печатех московских, и до патриархов, при митрополитех, и патриарсех при Иове, Гермогене, при Филарете, и Иоасафе, и во инех и при Иосифе, и меж патриаршества, печатано под титлою сице: Иоанн, над ѿ, или ѿ, или Ѡ титлу полагаху; а где без титлы, ту складом "Иван" печатаху. Во Уставе, ноября в 13 день, напечатано "Иванна Златоустаго", лист 258. Устав напечатан при Иоасафе патриарсе. Во Уставе, печатанном при царе Василии Ивановиче Шуйском и при патриарсе Гермогене в лето 7118 "Иванна Возлюбленнаго" лист 153, "Иванна Златоустаго" лист 132; а в предисловии того Устава, во многих местах, печатано "царя Василия Ивановича". В Потребнике иноческом, во многих местех, складом печатано: "Иван", на листу 214 во двух местех и на листу 219 на обороте; и на листу 223 на обороте же; и 234-м Златоуста; и на листех 235-м и 237-м. В Прологу печатном, Иоасафа патриарха, октября в 14 день, лист 189, и в 21 день, лист 225 и 226; и в 22 день, лист 233; и февраля во 12 день, лист 817. В книзе Кирилла Иеросалимскаго "Иван", лист 230. В книге Святцах печатаных, в полдесть с летописью, выданных из печати при царе Алексее и при патриарсе Иосифе в лето 7155, во многих местех "Иванна": лист 116, декабря в 23; и октября в

5 день, лист 39; и октября в 14 день, лист 46; и февраля в 12 день, лист 166; и апреля в 30 день, лист 223, и лист 261, и 265 и 290. В Прологу Иосифа патриарха, печатном, сентябрьской половине: октября в 14 день, лист 199, в дву местах; того же месяца в 21 день, лист 233, в трех местах; того же месяца в 22 день, лист 241; декабря в 21 день, лист 558; февраля в 12 день, на обороте лист 802. В Прологу Иосифовском, мартовской половине, мая в 15 день, на листу 389-м, в дву местах, и на листу 391-м. В Многогосложном Свитке печатном, в полдесть, Иосифовском, в Зиновьеве слове, на листе 143, в дву местех "Иванна Богослова". В книге печатной в десть, в житии Сергиеве Радонежскаго, изданной при царе Алексие Михайловиче в лето 7155, во второе лето царства его, в 5-е лето патриарха Иосифа, и в той книге, во многих местах, печатано: "Иванн": Лист 22, и 27, и 121, и 122, 124, и 127, и 143, и 156, и 158.

А которья книги печатаны при царе Феодоре Ивановиче — Триоди и Октай, и в тех книгах назади, в летописи, напечатано сие складом: "при царе Феодоре Ивановиче". А яко же в прочитаниих древние отцы по обителем Соловецкой и в прочих Российских церквах свидетельствовашу — "Иванном" глаголаху. Тако сей древний церковной обычай и инеми свидетельства подтверждается: в "певчих" во всех древних "книгах", в величаниих Богослова, и Предтечу, и Златоустаго, и прочих святых того имени, "Иваном" величаху; тако же и на праздники их, и прочих святых, их же имя "Иванн", во стихерах и славниках "Иванном" пели. И на иконах древних, где без титлы, на местех "Иванном" воображаху, яко же и на чудотворном Распятии, от Иванна Богослова данном Авраамию Ростовскому, воображено древними писмены Богослова имя "Иванн". Тако царския имена "Иванном именовашу: царя "Иванна Васильевича" в Стоглаве и летописных и в печатных в то время, на задней летописи, яко же и сына его "Феодора Ивановича". В Триодех и Октаех печатных, назади, в Минеи Четьи Макария митрополита, августовой, близ задней дски, речь жидовскаго языка преложена на русскую речь, неразумное на разум, иже во Евангелии, и во Апостоле, и во Псалтыри, и в Паремьи, и в прочих книгах: во оном преложении написано "Иван русски — *благодать*". Убо яко же бяше в России древний церковной обычай, тако, по обычаю Соловецкия обители, и глаголем: и не подобало бы им, для сего древняго отеческаго именованья, тако страшитися, яко же у их в писме написано, вящше же и инех их на нас мнение сие устрашающее. Елма же во Иоасафских последних и в Острожских печатех Иоанново имя без титлы "Иоанн" печатано не зазираем мы, аще кто Иоанном прочитает.

#### *О кажении.*

В "Сыне Церковном" не велено тако, яко они горе руце простирают, но стоящим, по Уставу, согбены руце к персем имущим, повелевает, егда священник или диакон кадит, руце распростерти, сиречь согбенныя к персем распростерти, а не горе подымати, яко же они творят. Тако бо древле не во время кажения, но, по печатем Филаретовским и Иоасафовским, во время святаго крещения горе простирали руце, егда отрицаются диавола, и прочая его — убо древле пред священническим и диаконским кажением рук горе не простирали. А они, неведомо по какому уставу, пред простых кажением руце горе простирают, да еще зазирают, еже у нас, по обычаю благоговейных прежде нас отец, кажением животворящий крест благоухания сподобляют; а и носяй его не не сподобляется же благовонья фимиама. Аще ли хотят нас о сем воспретити, да покажут вам от Писания: како чин простых кажения предлежит, и тогда от отеческаго обычая нас да отводят; а не видевши о сем от Писания, нам надежнее послушати премудраго Сираха, глаголюща: "не отступай от заповедей старец, ибо тии навькоша от отец своих".

И сия убо, с Богом помощником, против их стязания возответствовашом по разуму древних отеческих обычаев, покажем отныне самех их, разглашающихся с древними церковными чины.

1. В поясных поклонах на "Царю небесный" чрез древний чин полагаемый от них поклон: яве бо в Часословах напечатано на "Святый Боже" точию по 3 поклона. А что они мнятся великопостными уставы подтвержати сей поклон, то будет им и прочие поклоны по великопостному полагати: на "Часех", на Богородичных "что Тя наречем" и "Богородице, Ты еси лоза истинная", и на прочих по 3 поклона. А понеже разнятся постные поклоны с поясными, всеуе они извет сими творят, а ясно в Часослове и Служебнице Иосифа патриарха, на малей вечерни в неделю, напечатано древний церковной обычай: еже точию на "святый Боже" по 3 поклона, а на "Царю небесный" несть поклона, — пренебрегают.

2. В Часослове же напечатано на "Сподоби Господи в вечер сей", в начале, по 3 поклона полагати; они же в то время стоят, а полагают на "Благословен еси, Господи, научи нас оправданием Твоим".

3. На Полунощницах воскресных полагали они поклон на "Достойне": а велено той поклон полагати проговоря "Отче Вседержителю", егда рекут "помилуй и спаси поклоняющихся Ти".

4. Во время поясных церковных поклонов, егда веленныя в землю бывают: на Часех, и на Полунощницах, и на ужине на "Честнейшую", поклон в землю полагают, чрез древний церковный обычай. А яко же древле в православии сей поклон не с келейными, но с церковными прочими равно полагаху, показывает Устав: егда прилучится Трех Святителей и поспразднство Сретения в среду и пяток Сырныя недели, такоже Предтечи и иных полиелеосных святых в Пост Великий, тогда приходные и отходные поклоны земные. Повечерницу же Большую велено пети без поклонов, а на ней трижды "Честнейшую" глаголется, токмо на последнем "Честнейшую" по 4 поклона оцыстники [очистники], тии бо в пост и на Господские праздники не оставляются, а на дву "Честнейшую" на тех Повечерницах поклонов, подобне прочим церковным, полагати не указано. Подобне и к четвертку великаго канона: Повечерницу малую и Полунощницу велено пети без поклонов, а на "Честнейшую" тогда поклонов полагати не указано, а келейные поклоны тогда вси земные. А что они утвержаются, еже на 9-й песни на "Честнейшую" поклоны земные полагают, и по сему бы им и объясненнее мощно знати древний обычай, понеже на Часех, и на Полунощнице, и на Повечернице, во Уставе не повелевает полагати поклонов. А егда на утрени на 9-й песне с песнию Пресвятыя Богородицы, тогда особый чин об них ясно Устав выносит: земные поклоны полагати, а в древле Соловецком Обиходнице письменном тогда по "Иже на всяко время" поклон в пояс полагати велит. И тако по сему не подобало бы древняго чина презирати.

5. А не точию на ужине на "Честнейшую" поклона земнаго у прежних благочестивых отец не было, но и на

обеде на "Достойне" в пояс поклон полагаху, яко же во Обиходнице древле писанном Сергиева и Кириллова монастырей: велено всегда к "Достойну" земной поклон, точию за трапезою поклон в пояс полагати. Также и по Обиходнику Соловецких чудотворец дает знати, — повелевает по обеде и по ужине: егда речет келарь "За молитв", игумен ударит в кандию и братия вся возстанут, и стоят на своих местех, где кто сидел, и тако глаголют, по Уставу, на ужине и на обеде. И яве по сему, не земные поклоны полагаху, их же невозможно не выходя из-за стола полагати, но поясные, яже тако древний благочестивый обычай был.

6. А понеже вышереченные поклоны, во святых обителях в пояс бывшие, они, в землю полагающе, мнятся тем ревнители быти, еже бы и не прилично чрез святых обычай тако: на отпусте Часов и Вечерни, на "Слава и ныне", и "Святей Троице" по 3 поклона земные, в неспраздственные дни, древле в благочестии полагаемые, презирают, — в пояс их полагают. А яко же бяхе древлецерковный обычай, тако и во Псалтырях Иосифовских полудестевых, в них же о поклоне церковных, писанных на литургии, на отпусте, сии поклоны до земли полагати велено, да и во Обиходнице Соловецких чудотворцев, на утрени Великия субботы, велено на отпусте поклоны земные, и по сем целование на первом Часе. Также и на Часех, на отпусте, написаны поклоны земные.

7. По Заутрени, егда первый Час глаголати, начинают "за Молитв святых отец наших", — чего ни в коих древних Уставах говорить не написано.

8. На многолетне, на конце, вместо еже по древним старопечатным книгам: "Вся христиане, Господи, спаси": они же равно с никониянским прилогом, прилагают, глаголюще "Вся православные христиане".

Ельма убо о сих их вышереченных недостатках надеялися мы им тако исправитися, яко же и во инех, прежде бывших, братолюбием поцелишася, сие им с кротостию, по временем, братски по малу предлагахом. Ныне же они, не точию своего, от них зачатого обычая держашеся, древняго отеческаго не приемлют, но и самые древние чины у нас, не от себе зачатые, но от древних благочестивых отец истиннаго благочестия, паче же от Соловецкия обители приятые, яко же выше показавом, возражают. И, толь дерзостно расколотворение учинивше, еже и последи в письмах, всюду от них разсылаемых, увы, прелестию гаждают и равно с никонияны отлучают, и кто бы их послушал, всем тако заповедают.

И понеже мы во всех, от них зазираемых, статиях, видяще свою неповинность, церковнаго же предания держашеся, надежно во отеческих законех пребываем, противу их неправеднаго отлучения, и неблагоговения, и наводимыя клятвы, во ответ, от собрания святаго Иосифа Володскаго предлагаем.

*От жития святаго Симеона, иже на Дивней горе:* "Презвитер некий, завистию побежден бысть, проклял: и абие видев множество бесов, пришедших к нему, и связавше его опако рукама, яко немощи ему оттоле и святаго Евангелия прочитати". Видждь, яко аще кто не достойне проклянет или свяжет, себе проклянет и свяжет, якоже и пресвитер.

*Святаго Дионисия Ареопагита:* "Яко аще святитель паче воля Божия отлучит, не последует ему Божественный суд".

*Василия Великаго:* "Аще кто творит кого без благословения быти безвременно, сам да будет без благословения".

*Святаго Анастасия Синайскаго:* "Егда входите в дом, глаголите "мир дому сему", и аще будет ту сын мира, мир ваш почит на нем; аще ли же не будет достоин, мир ваш к вам возвратится; аще убо мир паки ко онем возвращается, зане же не обрести достойна себе, множае паче неблагоговение и клятва возвратится на главу неправедно ту посылающаго, яко не по вине сущу оному приятию, к нему же послана бысть; всяк убо все не благословляя и проклиная, себе не благословляет и проклиная; глаголет бо Соломон: "яко же летающие птенцы, суетная клятва не вселится ни в единого же, попускающе убо Богу, якоже рехом: настает безумные на мудрые и нечестивые на благочестивые, и неправедные на праведные, уничиживающе и обидяще".

Сия убо от многы скорби и туги, по разуму божественных писаний написавше, речем с божественным Иеремием: "кто даст главе моей воду и очима моима источник слез", да плачем нынешняго многомятежнаго волнения, колебания душам христианским. От многы же стязаний и клевет, в дерзостех, и сварях, и в сумнениях, деющиеся душам погибели. Ты же, — о, Царю славы, Христе Боже наш — призри на люди многоскорбные, различными волнами погружаемые, и просвети лице Твое на ны и помилуй ны, за молитв Пречистыя Ти Матере и всех святых, и Тебе славу возсылаем со безначальным Ти Отцем и с Пресвятым и благим и животворящим Духом, ныне и присно и во веки веком. Аминь.

#### 4. Письмо Андрея Денисова Евстрату Феодосиеву

Вселюбезнейшему господину Евстрату Федосиевичу, с любезною ти и единоревнительною дружиною, всебратственно о Христе Иисусе радоватися.

Понеже паче бури сладчайшая тишина, и паче тьмы солнечное сияние, и паче слепоты видение, всякому любезнейша есть и сладчайша, — сие бурливаго раздору сладчайший мир, и темная ненависти прекраснейшая любовь, весьма прелюбезнейша есть, и полезнейша, всякому здравейшему уму желательнейша суть, чесого вседушне искати апостольскими и пророческими вещаньми повелеваемы есмь мы, — вопиющу апостолу: мир гоните и святыню, и пророку заповедающе: възыщите мир и пожените и. Откуда и мы, грубии, яты сея любви люблением и сея церковныя сладости желанием понуждаеми, — брата отпустихом к вашей любви с писанием нашим, в котором добре размотритися и боголюбивым разумом разсудити, о мире церковном порадеши просим твою любовь. И с посланным сим братии нашей, труды для мира церковнаго восприемлющим, яви любовь любве ради Божии, и что вашей любви разсудитися противу нашего писания, мир или ответствование, благоволите по брате сем к нашей грубости отписать. Бог же мира и любви да даст мир и любовь в сердца ваша и наша, и сохранит ны от вселютейшаго диавола нападения. Аминь.

## 5. Послание на Ряпину мызу Андрея Денисова

Странствующим богорадне в новозавоеванных селитвах, о древнем благочестии подвизающимся, учащим и учимым, возлюбленным мужем и братии о Христе Исусе, радоватися.

Ничтоже тако исконому врагу наветовати потщательно, яко еже церковное соединение разоряти и христианское совокупление расколоти. О сем бо паче вселукавый подвизается и зельною яростию на христоименитое достояние дышет, в раздоры разсекая тело церковное; и иже друг другу спомоществовати и сболезновати должественные, сия друг на друга всековарный лщении своими сражает, и ратовати и угрызати наваждает прелукавый, ведый преокаянный, яко в раздорах и в разгласиях многа волкоядина овцам произыти возможет, и в прогневание Божие может многия многожды сими вринути. Иже в словесех или в делах истинны погрешающии, и в такова тимения вложить возмогает омраченный, яко не познавати своего им воистину сопротивления. Якоже на святого Евфросина возставшие древле псковичи за пресвятую аллилуию — возмнивши они иногда о истине ревновати, на истину ратоваша и хулиша грубосмысленни. Чесо ради и божественный Златоуст, во еже на послание к Ефесянам в нравочении 11 сице глаголет: "ничтоже тако раздражает Бога, яко еже церкви разделятися". И такова убо и толь тяжка расколов церковных беда — оле, жалостнаго плача! Не мину сие губительство бедне терпящих о благочестии христиан; не мину о церковном благоверии страждущих, о церковных преданиях раздирающихся. Еже и ваше братство, в прешедшее время, жалостное разодрание со иже в поморских странах пустынножители, проповедасте. И мнози от иже ваша лобызающих тяжкими хулами (за оная, яже в нас безприменно и безприбавочно древлецерковная предания соблюдаема) навходяще, и грубе и несмысленне ересию, содержанная святыми, порицающе. За что не без плача минем о таковых душах, — о, грубосте, в противление святым впадающим, — и слезим гибели таковыя и хулы таковых жалостне снедаемся, и Господа Бога молим просветити им умныя зеницы, во еже соглашати с содержанием святых и не ратовати на древлецерковная предания. О чем и ваше братолюбие молим сболезновати о христоименитых людех. Что бо умствуют, иже грубостию последнею содержимии? в ересь тяжкую, глаголют, поморские пустынножители впадоша, не пишуце на животворящем Христове кресте четырьмя буквами, сице: *І. Н. Ц. І.* знаменующими Пилатом написанную титулу "Исус Назарянин Царь Иудейский". Оле, тяжкия таковыя хулы: услышим и вонем, мужие и братие, вонем и боимся, да не впадем в таковой злохулительства ров. Во всю вселенную, елико бяше священнх жертвенников водружено [на поле: Большой Потребник печатной], предана от святых во всех церквах на антиминос животворящий крест вообразити и подписывати "Царь славы, Исус Христос, ника". Сия же четыре буквы не предано вообразити. Подобне и на водружальном кресте, тоже и на святом Агнце в тайнодействе Тела и Крови Христове. Еще же и во Уставех на Панагиарном хлебе тако предано вообразити. Сице убо преданием святейшею церковью предано и священными старописменными книгами засвидетельствовано; сице сам Христос равноапостольному царю Константину на небеси крест, кроме сих четырех букв, показа. Иже и он, по образу, показанному на небесех, три кресты сотвори, кроме сих четырех букв, якоже старопечатныя книги, Прологи, засвидетельствуют. Сице святой Никон Черныя горы в своей книзе [на поле: Тактикон, л. 197] от вселенския патриархи прия повеление кроме сих букв писати честныя кресты. Сице в российской патриархии и архиепископиях и в монастырех, по повелению благочестивых святителей и прочих пастырей, до Никона бывших, и многих святых, на Распятях кроме сих букв подписания имеютя быти, о чем премножество свидетельств, и яже в *другом* от нас писании засвидетельствовано. Тем же гаждающие ересию не пишущие четыре сия буквы на животворящем кресте хульствуют на вышепоказанное святых церковное предание, и вопиющие — не имети ни части, ни жребия за сия, грубостию своею, от части святых, тако вообразивших и предавших вообразити святые кресты, отлучатися дерзают: аще ли еже приводят сеж в свидетельство от Евангелия, прочих святых писаний писанное о написанной Пилатом титуле. И о сем, о друзи, разсудите: тамо нигде четыре оныя буквы писати не предано и вообразити не написано, и за неписание их раздиратися не велено. А и к божественному Писанию прилагающие или отъемлющие, или развращающие что — весть ваше братство! — таковая кафолическия церковь осуждению предает. Ко священному же Евангелию кривосказательне прилагающие предание о четырех буквах, яже тамо не написано, и на древнецерковное предание ратующе, — како таковии сами подпадают под церковное святых запрещений осуждение! И сиеваго в христианах бывающаго душевредия оплакующе и скорбяще, мы, грубии, со слезами молим ваше боголюбие, елицех учительных, елицех миротворных, в состоянии мужей: умилитесь и разсудите смиренномудренно о сем жалостном христиан разорвании и душевредии.

А еже от ваша страны за покупание брашен в путех с торжищ осуждают ны тяжце, скверноядением сия и достойными отлучения укоряюще, хульствуют, и брашна покупаемая и христианским на трапезах Бога благодарением освящаемая, скверна и нечиста, — увы! — дерзостно именующие, противно апостолу Павлу, к Коринфом и Тимофею в посланиях о том пишущему, и сказателю тех божественному Златоусту и прочим многим святым; яко же и великий Афанасий, в странных сущему и требующему снеди, в корчемницах купити повеле, — яже вся свидетельства краткости ради оставляем; но от самех вас содержания кратко воспоним. Ибо у самех вас, возлюбленнии, в вашем согласии, кто может от торжищ без покупания брашен минути? ибо соль, мед, масло, калачи покупаете. Я аще скверноядства — с торжища покупаемая брашна, и отлучатися за то должны, по ваших суду; то сами вы вси таковым суждением, скверноядственных отлучением, осуждаете. О мужие, братие, разсудите неправого и противнаго святых разсуждениям суда и самех себе тяжко осудительнаго. Или и поклоны за брашна у вас полагаются? но кто от святых за торжищна брашна поклоны полагати повеле? и аще у самех вас не по писанию сия творятся, како я за что прочие пустынножители от ваша страны всеу и туне, паче же за древнее святых содержание, осуждаются. Сих ради скорбяще мы такового душевредия, сим краткописанием молим ваше братство: воздвигнитесь мужие, братие воздвигнитесь боголюбным нравом, раскол сей, всеянный от супостата диавола, в христоименитых людех умирати, потщитесь, — тако с поморскими пустынножители, яко и с прочими благочестно согласными любовное свойство и о единогласии христоролюбное радение возымети и о церковном благочестии единоревностное усердие стяжати. Ибо и

они, пустынножители, ваше братолюбие всесердечно лобызают и вседушне соболезнуют и Господа Бога о вас безпрестанно молят и о согласии церковном с вами всежеланно желают. Аще бо божественный Златоуст: "ничтоже тако раздражает Бога, яко еже церкви разделятися, аще и безчисленная будет содеявше благая, от иже тело Его пресецающих, не меньшую примем казнь, ссецающе исполнение церковное". Како, возлюбленнии, не убоимся гнева Божия, за раскол церковный бывающаго и хотящаго быти? Или паки, сам Христос глаголет: "о сем разумеют вси, яко Мои ученицы есте, аще любовь имате между собою". И паки: "блажени миротворцы, яко тии сынове Божии нарекутся". То не востече ли, возлюбленнии, к любовней благодати, не вождедем ли миротворства ради быти сынове Божии. Ей, да даст нам Господь Бог, в плачевные сия и многоскорбные нам дни сию радость христианскаго согласия видети, и о благочестивых преданиях единогласно со святыми и между собою единоплеменными; якоже древле по распре и разгласии между святыми Кириллом и Феодоритом и прочими восточными, паки любовное и единогласное соединение и о догматах единоумное рассмотрение. О, да подаст и нам Господь Бог сия восприяти. Аще ли же ваша любовь паки и паки имети будете несогласие, за ради четырех оных букв, яже мы, не видевше у святых писанных, подобне им не пишем на животворящем кресте: то благоволите нам о оном надписании ясность показати и против письма и вопросов наших ответствовати.

1. Где в божественном Писании предано и велено четыре сия буквы сице: I. H. Ц. I., вместо Пилатом тремя языки и целыми речми написанныя титлы на кресте писати?

2. Кое святое Писание повелевает два надписания на кресте писати, — едино: "Царь славы, Исус Христос, ника", второе на десе: "I. H. Ц. I."?

3. Еже у вас прочитаете о титле из Евангелия и Соборника и прочих святых книг, — кто от святых, до вас сие о тех четырех буквах во свидетельство приводил и писати я повеле?

4. Кто от святых толковников сия буквы тако толкова, якобы писати на досце креста за "Исус" — I, за "Назарянин" — H, за "Царь" — Ц, за "Иудейский" — I?

5. Каяждо буква — с титлою I или без титлы I предано вообразити, и что обоим протолкование?

6. В Толковом Евангелии, о написанном Пилатом тремя языки титле, пишет: "еже тремя грамотами написанное являет бо Господа Царя быти, и по деянию и по существу богословия мудрости", и прочая. И вы четырьмя буквами одинаго языка можете ли сию тайну изобразити и како изобразите, и по коему божественному писанию? — Сие нам объявите.

7. Еже Златоуст, в среду великую, о зависти жидовстей глаголет: "а егда Пилат на досце истину показа, гневается и ставляете писати, что глаголаху: не пиши "царь жидовск"". И паки ниже: "юродивыя беседы Филистимовы не ставляете писати, а славления не писати Божия, ими же на небо правимы есмь". И понеже Пилат тремя языки и целыми речми, а не четырьмя буквами титлу на кресте написа, а жидове, царство Христова неприемлющие и своим царем жидовским Христу нарицатися не любящие, тако глаголаху: не пиши "царь жидовск", и сие их неприяние царства Христова Златоуст обличаше оными глаголы. Вы же како и по коему Писанию на предание четырех букв писати — сия Златоустова речения проводите? Понеже святии писавше надписание кресту "Царь славы, Ис. Хс., ника, а четыре оныя буквы не писавше — еда истины и славления Божия не писаху? еда на небо не правимы суть?

8. От которых святых тако предано, еже бы всем имети на кресте сия четыре буквы "I. H. Ц. I." на знаменование Пилатом написанныя титлы, а кои христиане не будут имети написаны оны на кресте, пишуше "Царь славы, Исус Христос, ника" — и с теми не имети ни части, ни жребия, и раздиратися за сие с православно живущими благочестивыми христианы?

И сия вся, мужие братие, смиренномудренно с любовию рассмотревше, потщитесь о сих со святыми единогласно дыхати, преданиям их повинующеся. Аще ли же что вам мнится лучше разсуждение имети, подвигнитесь на вышепоказанные вопросы ответствование написати, от божественных Писаний и от святых преданий, а не от своемнительных басней и от разсуждений нецерковных; такожде и не клеветами, и не примышлениями и лжами, молим вас, любезных христианом христиан, облагати, и не яростию и дерзостию осуждати прочие благочестивые, якоже от ваших, сами мы слышавше, зело грубо и несмысленно дерзают: погибшими весьма православных за древлецерковная содержания, с клятвами кленущеся, безумне осуждают, сами погибающе хулою своею; и главою Храсту титлу, четырьмя буквами пишем от них, грубогубии именуют, и клеветуше лгут на пустынножителей, яко бы титлу с креста стирают и главу Христову (о буквах сих глаголюще) с креста снимают. Откуда явная, грубая ложь, ибо пустынножители на древних Распятях и крестах тыя четыре буквы писаны не имеша, и на воображаемых от них, подписывающе подобне старопечатным книгам и древнеписанным Распятям, подписывають. От новолубцев же нынешних пустынножители иконописания в пустынножительство не выменивають. Отуду, братие, явная ложь от вашей наносится страны, — с чего пустынножителям стирати тыя буквы, где не написаны прежде? разве и сия хулы на святых же касатися от вашей страны некаким образом будет, ибо святии, якоже в старопечатных книгах, тако на древних Распятях, не воображаху на кресте. А по ваших усердию, подобало бы им быти, аки от Евангелия предано; святии же, по тех суждению, аки бы отняша сия. Тем же с плачем молим вашу любовь: помилуйте, помилуйте, возлюбленнии, тако свои души, яко прочие грубоумные, в дерзостех своих увязающие в тяжкия хулы. Умилитесь, братие, и о мире христиан попекитесь, — рассмотрите и разсудите, потщитесь, возлюбленнии, о согласии церковном, и миротворцы христоименитым людем будем, да сынове Божии быти получим по священному святому Спасову гласу: "блажени миротворцы, яко тии сынове Божии нарекутся". Да даст же, даст Царь славы, Сын Божий, вашему братолюбию и нам, грубым, единогласно со святыми и с друг другом любовно и глаголати, и мудроствовати. Ему же, всещедрому Владыке, Исусу Христу, буди о всех честь, и слава, и поклонение, с безначальным Его Отцем, и со Святым Духом, ныне и во вся веки, аминь.